

Uunga siunnersuut: Suliassat meeqqanik kinguaassiuutitigut atornerluinermut tunngasut pisoqalisinnaanginnerannik qulakkeerisumik Kalaallit Nunaanni pinerluttaalisitsinermut inatsisimmi § 21-p imaanik allanngortitsitsinissaq siunertaralugu Inatsisinik Atortitsinermut ministeri siunnersuummik saqqummiusseqqullugu qinnuigineqarnissaa pillugu, Naalakkersuisut peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasortaq Astrid Fleischer Rex, Demokraatit)

Akissuteqaat

(Nunamut Namminermit, Pinngortitamut Avatangiisinullu Naalakkersuisoq)

Siullermeerinnineq

Inatsisartut matumani ataatsimiinneranni apeqqutip pingaaruteqartup oqaluuserisassanngortinnera pillugu siunnersuuteqartoq Naalakkersuisut sinnerlugit qujassuteqarfigerusuppara.

Meeqqat atugaat suliassaqrarfiuvoq Naalakkersuisunit assut pingaartinneqartoq, aamma suliassanik pingaarnersiulluni tulleriissaarinnermi sallernut ilaatinneqartoq. Erseqqilluinnartumik erseqqissaatigineqassaaq meeqqanik kinguaassiuutitigut atornerluisarneq Naalakkersuisut assut ilungersunangaartutut isigimmassuk taamaaliortoqartarneralu akuerineqarsinnaangilluinnarmat. Aamma qularutigineqassanngilaq meeqqanik atornerluillutik pinerlussimasunik pineqaatissiisarnermi eqqartuussiviit pisariaqartunik pineqatissiissutinik eqqartuussisarnissaannik suliat Naalakkersuisunit assut ilungersunartutut isigineqarmata.

Siunnersuummi pineqartoq danskit naalagaaffiata oqartussaaffigaa. Taamaattumik Naalakkersuisunut nunatsinni Politimesterimut saaffiginnissuteqarput.

Aallarniutigalugu erseqqissumik oqaatigineqassaaq meeqqanik kinguaassiuutitigut atornerluinerit pillugit suliassat pisoqalisinnaangimmata, tassa suliassani taamaattuni pasilliummik pasisamut saqqummiussinissamut piffissaliussat pinerluttulerinnermi inatsimmi § 21, imm. 1, nr. 2 malinneqartarmat. Eqqarsaatigineqarsinnaavoq pisoqarneraniit ukiut 20-t kingorna pasilliummik pasisaasumut saqqummiussisoqarsinnaanera.

Suliani taakkunani pasilliummik pasisaasumut saqqummiussineq unnerluussisussaataasuniit saqqummiunneqartarpoq, taakkunanilu namminissarsiunngitsumik, illuatungaaniittumut aamma iluaqutaasussat paasissutissat ilanngullugit oqimaaqatigiisumik periuseqartumik saqqummiusseriaaseq tunngavigineqartarpoq, tassalu imaappoq, paasiniaanermi pasineqartumi pisuutitsinermit pisuutitsinnginnermullu pissutsit ilaatinnessaannut politiit unnerluussisussaataasullu pisussaaffeqartut. Suliarineqartumi paasisat tunngavigalugit eqqartuussisoqarsinnaangitsoq naliliisoqarpat, suliame unnerluussisoqarsinnaangilaq.

Meeqqanik kinguaassiuutitigut atornerluinerit pillugit suliani pasilliummik pasisaasumut saqqummiussisoqarsinnaaneranik nalilersuineq sukumiisuusaaq ersarissuullunilu aamma ilaatigut pisoqarneraniit piffissaq ima sivisutigisoq ingerlareersoq pineqaatissiinissamut pissutissaqarnersoq naatsorsuutigineqarsinnaajunnaaneranik tunngaveqassalluni.

Peqatigisaanik pinerluttulerinermi inatsimmut nassuiaatinit erseqqissumik takuneqarsinnaavoq nalilersuinermi eqqarsaatigineqassasoq meeraq inersimasumut immikkuullarissumik attuumassuteqarsinnaammat, pisimasoq pereersup kingorna ukiorpasuit qaangiunnerisigut aatsaat suliassanngortinniarlugu nalunaarutigineqarsinnaalluni.

Suliassat pisoqalisinnaanerit pillugu apeqqut eqqartuussiveqarneq pillugu ataatsimiititaliarsuarmit aamma sukumiisumik suliaralugu sammineqarsimavoq. Eqqartuussiveqarneq pillugu ataatsimiititaliarsuup isumaqatigissutigaa pinerluttulerinermi inatsimmi nutaami pineqaatissiissutit killissanik atortuulersitsisoqannginnera pissutigalugu ajornanngitsumik suliassat pisoqalisinnaanerit piffissaliussat atortuulersinneqarsinnaanngitsut.

Kalaallit Nunaanni Politiit 2010 pillugu ukiumoortumik kisitsisitigut paasissutissiissutaannit takuneqarsinnaavoq arneriniarluni anguseriniarluniluunniit pinerluttuliornermut tunngatillugu pisut 371-it nalunaarutigineqarsimasut. Nalunaaruteqarnerni taakkunaniipput angutaaserluni arnerinerit, angutaaserluni arneriffiginninniarnit, meeqqanik atorneerluinerit, atoqatigiinnissamut pilerilersitsinerit aamma kanngunartuliorfigisaanerit kinguaassiuutinit aallaavillit. Sulianit taakkunannga pisimasut ilaat naammattumik uppersarneqarsinnaasimannimmata suliassat 67-it unitsiinnarneqarsimapput, tamannalu namminissarsiunngitsumik, illuatungaaniittumut aamma iluaqutaasussat paasissutissat ilanngullugit oqimaqatigiissumik periuseqartumik saqqummeriaaseqarnerup taaneqartup toqqaannartumik malitsigaa.

Nunatsinni Politimesterip siunnersuut tunuliaqutaralugu ilassutigalugu oqaatigaa pasilliummik pasisaasumut saqqummiussinnginnissaq pillugu maleruagassat eqqartuussisarneq pillugu inatsimmi § 312-miit takuneqarsinnaasut.

Pingaartumik arneriniarluni anguseriniarluniluunniit pinerluttuliornermut tunngatillugu oqaatigineqassaaq suliame unnerluussuteqarsinnaatinnagu pasilliut amerlanertigut unitsinneqartarmat § 312, nr. 2-mi aalajangersakkamut innersuussisoqarluni. Tassunga atatillugu ilisimatitsissutigineqarsinnaavoq pinerluttulinerneq pillugu suliame uppersaatinigineqartuni pisuutitsilluni eqqartuussinissamut pisariaqartunik unnerluussisussaataasut uppersaataissaqannginnerat pissutigalugu tunngavilersuut taanna atorneqakkajuttarmat.

Meeqqanik, aamma arnanik, atorneerluinerit amerlavallaartut ikilisinneqarnissaat Naalakkersuisut assut soqutigisaraat, tassungalu sammisunik Naalakkersuisut arlalinnik suliniuteqarlutik, soorlu aamma pinerlunnernit taakkuninnga eqqorneqarsimasunut ajunngitsunik neqerooruteqarnissaq Naalakkersuisunit pingaartutut isigineqartoq.

Peqatigisaanik nunatsinni pinerluttulerinermi inatsit tunngavinnik pingaaruteqartunik arlalinnik tunngaveqassasoq Naalakkersuisut isumaqarput, tassunga ilanngullugu paasiniaalluni misissueqqissaarnermi nammissarsiunngitsumik tunngaveqarneq, nunamut nutaaliaasumut inatsisit tunngavigalugit naalakkersugaasumut ilisarnaataalluinnartoq.

Tamakkiisumik nalilersuineq tunuliaqutaralugu, nunatsinni Politimesterimiit ilassutitut paasissutissiissutigineqartut ilanngullugit, Naalakkersuisut paasivaat meeqqanik kinguaassiuutitigut atorneerlunermi suliassanut tunngatillugu suliassat pisoqalisinnaanerit pillugu piffissamik killiliussamik maleruagassamik peqanngitsaq.

19. oktober 2011

UPA 2012/22
UKA 2011/135

Taamaattumik Naalackersuisut Inatsisinut Ataatsimiititaliaq qinnuigissavaa
aalajangiiffigisassatut siunnersuut suliareqqullugu aappassaaneerneqarnissanullu
isumaliutissiissuteqarluni.